

Na osnovu člana IV. 4 a) Ustava Bosne i Hercegovine, Parlamentarna skupština Bosne i Hercegovine, na 41. sjednici Predstavničkog doma, održanoj 14. jula 2004. godine, i na 26. sjednici Doma naroda, održanoj 16. jula 2004. godine, usvojila je

## ZAKON

### O OSNIVANJU NEZAVISNOG OPERATERA SISTEMA ZA PRIJENOSNI SISTEM U BOSNI I HERCEGOVINI

#### OPĆE ODREDBE

##### Član 1.

#### Cilj zakona

1. Ovim zakonom uspostavlja se neprofitni Nezavisni operater sistema za upravljanje radom prijenosnog sistema u Bosni i Hercegovini, "Nezavisni operater sistema Bosne i Hercegovine" (u daljem tekstu: NOS) i definiraju se njegove funkcije, ovlaštenja, upravljanje i vlasništvo. NOS će obavljati svoje djelatnosti na cijeloj teritoriji Bosne i Hercegovine.
2. Cilj ovog zakona je uspostavljanje Nezavisnog operatera sistema i osiguranje kontinuiranog snabdijevanja električnom energijom po definiranim standardima kvaliteta za dobrobit građana Bosne i Hercegovine. Zakonom se namjerava podržati stvaranje tržišta električne energije u Bosni i Hercegovini i integracija tog tržišta u regionalno tržište električne energije i regionalne razvojne aktivnosti u vezi s energijom. Zakon se bazira na postojećoj međunarodnoj praksi i primjenjivim direktivama Evropske unije (i implementaciji direktiva EU u zemljama članicama Evropske unije).

##### Član 2.

#### Svrha osnivanja NOS-a i isključivo ovlaštenje

1. Djelatnosti NOS-a uključuju upravljanje sistemom prijenosa u svrhu osiguranja pouzdanosti, upravljanja sredstvima i uređajima u centralnom kontrolnom centru, upravljanje balansnim tržištem i osiguranje sistemskih usluga, osiguranje pomoćnih usluga, razvoj i primjena standarda pouzdanosti, razvoj i upravljanje pravilima koja reguliraju korištenje prijenosnog sistema, razvoj i provođenje tržišnih pravila koja rukovode odredbama vezanim za sistemske i pomoćne usluge nad prijenosnim sistemom, kao i drugim aktivnostima u skladu s članom 7. ovog zakona (ovlaštenja NOS-a). Nakon osnivanja NOS-a, nijedna druga elektroenergetska, niti bilo koja druga kompanija, ni organ neće imati nadležnosti ni ovlaštenje u gore navedenim djelatnostima.
2. NOS-u je zabranjeno da se bavi na bilo koji način sljedećim aktivnostima koje uključuju: proizvodnju, snabdijevanje, trgovinu ili distribuciju električne energije, ili bilo kojom drugom aktivnosti koja nije odobrena ovim zakonom.

##### Član 3.

#### Definicije

U okviru ovog zakona primjenjivat će se sljedeće definicije:

1. "Pomoćne usluge" znače sve usluge, osim proizvodnje i prijenosa električne energije, koje se isporučuju NOS-u u svrhu pružanja sistemskih usluga, uključujući, između ostalog, i kontrolu frekvencije, rezerve, reaktivnu snagu, kontrolu napona i mogućnost startovanja centrale bez vanjskog napajanja električnom energijom.

2. "Sredstva" podrazumijevaju svu imovinu i prava koja propisno ulaze u sastav računovodstvenih izvještaja i bilansa stanja kompanije izraženih u novčanoj vrijednosti, u skladu s važećom računovodstvenom praksom.
3. "Balansno tržište" znači centralno tržište za nabavku i prodaju električne energije kojim rukovodi NOS u svrhu održavanja kontinuiranog balansa snabdijevanja i potražnje u realnom vremenu, kao i dodatni mehanizmi koje provodi NOS u svrhu osiguravanja snabdijevanja sistemskim uslugama.
4. "Pravilnici" su definirani u članu 13. ovog zakona.
5. "Vijeće ministara" označava Vijeće ministara Bosne i Hercegovine.
6. "Distribucija" električne energije označava prijenos električne energije kroz srednjenaponske i niskonaponske distributivne sisteme za isporuku krajnjim korisnicima.
7. "Elektroprivrede" označavaju Javno preduzeće Elektroprivreda Republike Srpske, Javno preduzeće Elektroprivreda Bosne i Hercegovine i Javno preduzeće za proizvodnju, prijenos i distribuciju električne energije, Elektroprivreda Hrvatske zajednice Herceg-Bosne, ili svaki od njihovih pravnih sljednika koji je uključen u snabdijevanje električnom energijom.
8. "Entitet" označava Federaciju Bosne i Hercegovine ili Republiku Srpsku. "Entiteti" se odnose i na Federaciju Bosne i Hercegovine i na Republiku Srpsku.
9. "Proizvodnja" označava proizvodnju električne energije.
10. "Proizvođač" označava kompaniju ili neki drugi organ koji proizvodi električnu energiju.
11. "Važeće računovodstvene prakse" znači računovodstvene principe i prakse uspostavljene Međunarodnim kodeksom računovodstvenih principa i Međunarodnim računovodstvenim standardima koji su usvojeni i objavljeni od strane Međunarodnog instituta za računovodstvo i reviziju.
12. "Dobra vjera" znači poštenje u obavljanju poslova ili djelovanju; ako se odnosi na direktora ili člana Upravnog odbora NOS-a, dobra vjera zahtijeva ispoljavanje razumnog poslovnog prosuđivanja nakon racionalnog razmatranja činjenica.
13. "Mrežni kodeks" označava pravila i procedure koje rukovode tehničkim pitanjima koja se odnose na povezivanje na prijenosni sistem, korištenje i rad prijenosnog sistema, uključujući odredbe koje opisuju postojeće okolnosti pod kojim se može preduzeti hitna mjera korekcije u slučaju isporuke, i to kada može biti preduzeta i od koga.
14. "Nezavisni član" kao što je definirano u članu 25. (Imenovanje Upravnog odbora), članu 45. (Registracija NOS-a i početak poslovanja) i 47. (Vanredna ovlašćenja nezavisnog člana Upravnog odbora) ovog zakona.
15. "NOS" znači Nezavisni operater sistema Bosne i Hercegovine kao što je definirano u ovom zakonu i Zakonu o prijenosu, regulatoru i operateru sistema električne energije u Bosni i Hercegovini ("Službeni glasnik BiH", br. 7/02 i 13/03), (u daljnjem tekstu "Zakon o prijenosu").
16. "Obaveze" znače sve dugove koji nameću obaveznu i tačno određenu isplatu ili, ukoliko su uslovljene, da ima dovoljno mogućnosti da postanu tačno određene da bi se procijenio vjerovatan iznos, koji treba da se unese u računovodstvene izvještaje i bilanse stanja kompanije kao novčane vrijednosti na osnovu važećih računovodstvenih praksi i standarda.
17. "Tržišna pravila" znače poslovni kodeks kojim se uređuju pravila i procedure balansnog tržišta kao i komercijalni uslovi za konekciju na korištenje i rad prijenosnog sistema.
18. "Pouzdanost" znači kratkoročna sigurnost sistema.

19. "DERK" označava Državnu regulatornu komisiju za električnu energiju kako je definirano u Zakonu o prijenosu.
20. "Statut" označava akt NOS-a, odobren od Upravnog odbora, kojim se regulira poslovanje NOS-a i kome su podređeni svi drugi akti NOS-a.
21. "Sistemske usluge" znače sve usluge koje pruža NOS kako bi se obezbijedio siguran i efikasan transport električne energije u prijenosnom sistemu, riješili prekidi u transportu električne energije većeg nivoa i održavao i ponovo uspostavio balans energije u prijenosnom sistemu.
22. "Prijenos" znači transport električne energije preko visokonaponskog povezanog sistema za isporuku krajnjim korisnicima, distribucijama i susjednim elektroenergetskim sistemima.
23. "Prijenosna kompanija" znači akcionarsko društvo za prijenos električne energije, Elektroprenos Bosne i Hercegovine, kako je opisano u Zakonu o prijenosu.
24. "Glas" označava, bez ograničenja, glasove, odustajanja, obavijesti, saglasnosti i pisane dokumente potpisane od članova Upravnog odbora umjesto preduzimanja aktivnosti na Skupštini akcionara, kao i primjedbe i neslaganja na prethodno.
25. "ZEKC" znači Zajednički elektroenergetski koordinacioni centar za Bosnu i Hercegovinu.

#### Član 4.

##### **Naziv i sjedište**

1. Naziv Kompanije je "Nezavisni operater sistema u Bosni i Hercegovini."

Sjedište NOS-a je u Sarajevu.

#### Član 5.

##### **Osnivanje NOS-a i prijenos sredstava i obaveza**

1. NOS se osniva kao neprofitna kompanija u skladu s ovim zakonom i bit će registrirana u skladu s članom 9. ovog zakona (Registracija NOS-a).
2. Sredstva i obaveze koje pripadaju ZEKC-u, kao i sredstva i obaveze elektroprivreda a koja su neophodna za rad NOS-a, uključujući i, ali i ne ograničavajući, SCADA/EMS opremu, automatski će se prenijeti i postat će vlasništvo NOS-a po obavljanju registracije NOS-a u skladu s članom 9. (Registracija NOS-a). Ovaj automatski prijenos uključivat će sva sredstva, obaveze i vlasnička prava nad imovinom, uključujući i pokretnu, nepokretnu, materijalnu ili nematerijalnu imovinu, finansijska sredstva kao i svako drugo pravo, ili interes na dio ili cjelokupnu imovinu. Međutim, i nakon prijenosa, elektroprivrede koje prenose imovinu kao i njihovi pravni sljednici bit će posebno i solidarno odgovorni prema Kompaniji za bilo koje obaveze koje su osigurane, ili za koje se garantira u cijelosti ili djelimično imovinom ili obavezama prenesenim na Kompaniju, a koje su nastale na osnovu bilo kojeg zajma ili kredita koji su direktno ili indirektno uzeti od države ili entiteta, osim ako se drugačije ne dogovori sa svakom pojedinačnom relevantnom međunarodnom finansijskom institucijom. Isključivo u svrhu prijenosa ove imovine, smatrat će se da je pravo vlasništva nad ovom imovinom pravno valjano. Pravosnažno na dan prijenosa takvih sredstava, obaveza i vlasničkih prava, funkcije ZEKC-a postat će isključiva nadležnost i pravo NOS-a i ZEKC će prestati postojati.
3. Troškove osnivanja NOS-a snosit će elektroprivrede, u skladu s odredbama člana 42. (Osnivački troškovi NOS-a i zahtjev za odobrenje DERK-u) i 47. (Vanredna ovlaštenja nezavisnog člana Upravnog odbora) ovog zakona.

#### Član 6.

## **Neprofitni status**

Poslovanje NOS-a neće se vršiti u svrhu ostvarivanja dobiti, a prihodi NOS-a koristit će se isključivo u svrhu provođenja njegovih ciljeva. DERK će, s vremena na vrijeme, prilagoditi odredbe tarifa NOS-a za rad sistema baziranih na troškovima kako bi se izbjeglo permanentno veće ili manje ubiranje prihoda od strane NOS-a. Status NOS-a kao neprofitnog pravnog lica neće se tumačiti na način na koji se NOS-u onemogućava veće ili manje prikupljanje prihoda u periodima kada se prilagodavaju tarife rada sistema na osnovu troškova.

### Član 7.

#### **Ovlaštenja NOS-a**

NOS će preuzeti sljedeće funkcije, pored funkcija koje su navedene u članu 5.2 Zakona o prijenosu:

1. Upravljanje radom svih visokonaponskih prijenosnih uređaja u Bosni i Hercegovini čija je snaga 110 kV ili više, osim što NOS može dodijeliti ovlaštenje odgovarajućim stranama koje su uključene u aktivnosti prijenosa za upravljanje radom određenih visokonaponskih prijenosnih uređaja od kojih se ne zahtijeva omogućavanje slobodnog protoka električne energije iz značajnih energetske izvora preko međusobno povezane prijenosne mreže;
2. Izdavanje uputstava za dispečiranje proizvođačima i uvoznicima;
3. Rukovođenje uređajima i sredstvima centralnog kontrolnog centra i bilo kojim sredstvima za daljinsku kontrolu;
4. Rukovođenje balansnim tržištem;
5. Nabavka pomoćnih usluga i pružanje sistemskih usluga;
6. Pripremanje, modifikovanje i primjena standarda pouzdanosti, tržišnih pravila i mrežnog kodeksa;
7. Osiguravanje nediskriminatorskog ponašanja prema korisnicima sistema ili klasama korisnika sistema;
8. Razrada i distribucija faktura kao što je predviđeno Statutom za tarife NOS-a koje su zasnovane na troškovima rada sistema NOS-a, te za transakcije na balansnom tržištu;
9. Koordinacija i odobravanje planiranih prekida snabdijevanja prijenosnih i proizvodnih postrojenja i koordiniranje i odobravanje promjene rasporeda prekida;
10. Pregledanje, odobravanje, direktna revizija i objavljivanje dugoročnog plana razvoja prijenosa koji dostavi Prijenosna kompanija;
11. Utvrđivanje indikativnog proizvodnog razvojnog plana s podacima dostavljenim od proizvođača, distributivnih kompanija i krajnjih korisnika koji su direktno povezani na prijenosni sistem;
12. Uspostavljanje odgovarajuće poslovne politike i pravila o tretmanu povjerljivih informacija, što je predmet revizije DERK-a;
13. Pripremanje godišnjih i tromjesečnih izvještaja o radu prijenosnog sistema i balansnom tržištu električne enegije.

### Član 8.

#### **Regulacija NOS-a i međusobni odnos s Prijenosnom kompanijom**

1. NOS-a će biti reguliran od strane DERK-a. DERK ima ovlaštenje da izvrši uvid u poslovne knjige i arhiv NOS-a.

2. DERK će, u skladu sa svojom nadležnosti koja je propisana u Zakonu o prijenosu, imati ovlaštenje da riješi svaki spor koji proizilazi ili se tiče primjene ovog zakona na zahtjev države, entiteta, NOS-a, Upravnog odbora, Prijenosne kompanije, elektroprivreda, proizvođača, trgovca energijom, snabdjevača, ili bilo kojeg drugog lica koje je direktno povezano, ili se oslanja na prijenosni sistem. Odluka DERK-a podliježe reviziji od strane Suda u skladu s članom 14. Zakona o Sudu Bosne i Hercegovine ("Službeni glasnik BiH", broj 29/00). DERK nema ovlaštenje da rješava bilo koji spor u vezi s vršenjem ovlaštenja nezavisnog člana Upravnog odbora, propisanih u članu 47. ovog zakona. (Vanredna ovlaštenja nezavisnog člana Upravnog odbora ).

3. NOS i Prijenosna kompanija međusobno će saradivati i koordinirati u cilju rješavanja pitanja koja se odnose na primjenu ovog zakona i drugih pitanja koja su vezana za djelotvoran rad, održavanje, izgradnju i proširenje prijenosne mreže, u skladu s odredbama DERK-a kada je to potrebno.

#### Član 9.

##### **Registracija NOS-a**

NOS će biti registriran kao pravno lice Bosne i Hercegovine, u skladu sa Zakonom o registraciji pravnih lica koje osnivaju institucije Bosne i Hercegovine ("Službeni glasnik BiH," broj 33/02) (u daljnjem tekstu: Zakon o registraciji). Statut NOS-a, kao i njegove izmjene i dopune, bit će objavljeni u "Službenom glasniku BiH".

#### Član 10.

##### **Saradnja države i entiteta**

Državna i entitetske vlade saradivat će kako bi razmatrale i riješile pitanja koja se odnose na implementaciju ovog zakona i druga pitanja koja se odnose na efektivan rad i upravljanje NOS-om.

#### Član 11.

##### **Vlasnici**

1. Vlasnici NOS-a su:

- a) Federacija Bosne i Hercegovine, 71000 Sarajevo, Alipašina ulica br. 41 i
- b) Republika Srpska, 78 000 Banja Luka, ulica Vuka Karadžića br. 4.

2. Vlasništvo NOS-a je neprenosivo. Akcije se neće izdavati vlasnicima i neće postojati skupština akcionara. Vlasnici će koristiti svoja vlasnička prava putem Upravnog odbora.

#### Član 12.

##### **Statut**

Statut NOS-a utvrđuje, između ostalog, odredbe koje reguliraju djelatnosti NOS-a, uspostavljaju opća pravila za rad organa NOS-a, uključujući i odredbe o ovlaštenjima, obavještenjima o održavanju sjednica, organizaciji NOS-a, odlučivanju, vođenju zapisnika i svim drugim pitanjima koja se tiču rada ovih organa, kao i popis i procjenu sredstava i obaveza NOS-a, te finansiranje NOS-a.

#### Član 13.

## **Pravilnici i Etički kodeks**

1. Pravilnicima će se regulirati, između ostalog, detaljne procedure, pravila i propisi koji nisu regulirani Statutom, a koji se odnose na zapošljavanje, finansije i računovodstvo, te unutrašnju organizaciju i sistematizaciju radnih mjesta, kao i na detaljna tehnička pitanja.
2. Etički kodeks odredit će etičke obaveze i dužnosti članova Upravnog odbora i zaposlenika NOS-a i regulirat će, između ostalog, pravila kojima se zabranjuje NOS-u, članovima Upravnog odbora, direktorima i zaposlenicima da imaju vlasništvo, finansijski interes ili učestvuju u kontroli u bilo kojem učesniku na tržištu ili u njegovim podružnicama, a koji imaju dozvolu da učestvuju u bilo kojoj aktivnosti u elektroenergetskom sektoru. Etički kodeks može utvrditi razuman period za odricanje od zabranjenog vlasništva ili finansijskog interesa.

### **Član 14.**

#### **Finansiranje i tarife**

1. NOS može, uz odobrenje Upravnog odbora, sklapati ugovore i sporazume kako bi osigurao svoje finansiranje na bilo koji način, uključujući, ali ne ograničavajući se na zajmove, izdavanje mjenica ili obveznica s odgovarajućom kamatom, naplativih u vrijeme i mjesto i na način na koji se odredi, u bilo kojoj valuti, kao i prihvaćanje nepovratnih donacija međunarodnih organizacija, a na osnovu prethodnog odobrenja DERK-a, prema potrebi.
2. U skladu s članom 4.8 Zakona o prijenosu, NOS će prikupljati prihode na osnovu tarifa koje su zasnovane na troškovima rada sistema i iz drugih izvora, na način na koji to bude regulirao DERK, na osnovu prijedloga Upravnog odbora, odobrenog od strane DERK-a. Najmanje šezdeset (60) dana prije početka svake godine, ili u vrijeme koje utvrdi DERK, NOS će dostaviti DERK-u na uvid svoje predložene zahtjeve za prihode i rashode za narednu godinu, kao i troškove koje namjerava zaračunati po svojim tarifama za rad sistema.

### **Član 15.**

#### **Finansije, računovodstvo i godišnji izvještaj**

1. Finansijske aktivnosti NOS-a obavljaju se u skladu s odgovarajućim pravilnikom NOS-a i važećom računovodstvenom praksom.
2. Reviziju godišnjih finansijskih izvještaja vršit će nezavisna računovodstvena firma na zahtjev Upravnog odbora u roku od sedamdesetpet (75) dana po završetku fiskalne godine NOS-a.
3. U roku od devedeset (90) dana po isteku fiskalne godine NOS-a, NOS će dostaviti svoj godišnji izvještaj o poslovanju u toj fiskalnoj godini, uključujući i godišnje finansijske izvještaje koje je revidirala međunarodna revizorska firma, Vijeću ministara, vladama Federacije Bosne i Hercegovine i Republike Srpske i DERK-u i omogućiti da budu dostupni javnosti. Godišnji izvještaj potpisat će predsjednik Upravnog odbora. Godišnji izvještaj bit će objavljen u "Službenom glasniku BiH".

### **Član 16.**

#### **Rezerve**

Upravni odbor može stvoriti i održavati razumne rezerve obrtnih sredstava. Rezerve se mogu koristiti da stabiliziraju zahtjeve po prihodima, da se izbjegne promjenjivost tarifa, da se omogući da NOS ispuni svoje finansijske obaveze, i da se omogući dugoročna finansijska stabilnost i likvidnost NOS-a. Rezerve obrtnih sredstava položiti će se i njima će upravljati finansijska institucija čiji je dugoročni kreditni rejting ocijenjen od strane kompanije Standard and Poor's s najmanje A- ili s ekvivalentnim rejtingom od strane druge priznate međunarodne kompanije za ocjenjivanje kreditnog rejtinga. Dodatne potrebe za rezervama obrtnih sredstava bit će određene Statutom.

## Član 17.

### **Organi NOS-a**

Upravljački organi NOS-a su:

1. Upravni odbor,
2. Uprava.

## Član 18.

### **Savjetodavno vijeće**

1. Upravni odbor osnovat će Savjetodavno vijeće i imenovati njegove članove. Svrha Savjetodavnog vijeća bit će da pruži informacije, povratne informacije i pomoć Upravnom odboru o pitanjima koja se tiču rada prijenosnog sistema i balansnog tržišta. Savjetodavno vijeće neće imati odgovornosti nadzora nad donesenim odlukama Upravnog odbora već će služiti kao izvor informacija i sredstvo za osiguravanje stanovišta širokog spektra učesnika koji imaju interes u radu prijenosnog sistema i balansnog tržišta, i razvoj konkurencije na elektroenergetskom tržištu. Savjetodavno vijeće sastojat će se od približno 12 članova koji će predstavljati širok spektar interesa, uključujući samo u svrhu ilustracije, ali ne i ograničavajući lica koja predstavljaju sljedeća stanovišta:

- a) potrošača u domaćinstvu;
- b) komercijalnog ili industrijskog potrošača;
- c) učesnika na tržištu;
- d) ekonomskog;
- e) tehničkog (inženjeri);
- f) pravnog;
- g) akademskog.

2. Upravni odbor donijet će poslovnik o radu Savjetodavnog vijeća kojim će, između ostalog, imenovati predsjedavajućeg i utvrditi obavezu održavanja najmanje tri (3) sastanka godišnje između Upravnog odbora i Savjetodavnog vijeća. NOS će Savjetodavnom vijeću pružiti administrativnu podršku koja je potrebna da bi Vijeće obavljalo svoje funkcije. Savjetodavno vijeće neće imati svoje zaposlenike niti budžet i članovi će raditi bez naknade, s tim što će NOS isplatiti nadoknadu članovima Savjetodavnog vijeća u razumnom iznosu za sve troškove na ime prisustvovanja sjednicama Savjetodavnog vijeća. Na osnovu svoje odluke, NOS će odrediti opravdanost izdataka.

## Član 19.

### **Tehnički komiteti**

NOS će osnovati tehničke komisije u svrhu pružanja mogućnosti učesnicima na tržištu da pregledaju i daju komentare na pripremu i izmjene mrežnog kodeksa i tržišnih pravila. NOS će javno objaviti podatke o sastancima tehničkih komisija i takvi sastanci bit će otvoreni za sve učesnike na tržištu. NOS ne može, osim u hitnim okolnostima koje zahtijevaju brzo djelovanje, promijeniti mrežni kodeks i tržišna pravila bez prethodnih konsultacija s odgovarajućom tehničkom komisijom.

## Član 20.

## **Posebna godišnja sjednica Upravnog odbora**

Posebna sjednica Upravnog odbora održavat će se godišnje pod predsjedanjem predsjednika Upravnog odbora. Vrijeme i mjesto održavanja sjednice bit će određeni u skladu sa Statutom i Poslovníkom o radu. Javno obavještenje o održavanju sjednice bit će objavljeno najmanje dvadeset (20) radnih dana prije dana održavanja.

Član 21.

### **Uvid u poslovne knjige NOS-a**

Vlasnici NOS-a i DERK imaju pravo uvida u poslovne knjige i arhivu NOS-a, kao i druga lica po odobrenju Upravnog odbora i u skladu sa Statutom.

Član 22.

### **Upravljanje NOS-om**

U skladu s odredbama ovog zakona, poslovanje NOS-a nadzire Upravni odbor, a poslovanjem rukovodi generalni direktor, odnosno lice koje on ovlasti.

Član 23.

### **Ovlaštenja Upravnog odbora**

Upravni odbor ima sljedeća ovlaštenja:

- 1) donošenje Statuta i njegovih izmjena i dopuna;
- 2) usvajanje i odbijanje godišnjih finansijskih izvještaja;
- 3) imenovanje generalnog direktora i, na njegov prijedlog, članova Uprave;
- 4) donošenje odluke o povećanju ili smanjenju rezervi obrtnih sredstava;
- 5) donošenje odluke o ulaganjima većim od 500.000,00 EUR;
- 6) odobravanje dugoročnog plana prijenosnog razvoja koji dostavi Prijenosna kompanija;
- 7) odobravanje i izdavanje godišnjeg izvještaja NOS-a;
- 8) utvrđivanje smjernica za generalnog direktora o provođenju poslovne politike i obaveza;
- 9) usvajanje ili odbijanje finansijskih izvještaja, osim godišnjih finansijskih izvještaja;
- 10) usvajanje i provođenje godišnjih planova koji se odnose na rad NOS-a;
- 11) donošenje odluka o pitanjima koja su upućena od strane generalnog direktora i drugih viših članova uprave NOS-a;
- 12) usvajanje pravilnika i Etičkog kodeksa NOS-a;
- 13) podnošenje zahtjeva za registraciju NOS-a na osnovu Zakona o registraciji kao i preduzimanje svih aktivnosti neophodnih za osnivanje NOS-a kako je propisano ovim zakonom;



- 14) podnošenje prijedloga vezanih za tarife DERK-u;
- 15) odlučivanje o drugim pitanjima u okviru svojih ovlaštenja u skladu sa Statutom.

#### Član 24.

##### **Donošenje odluka Upravnog odbora**

Odluke i akti Upravnog odbora donose se prostom većinom glasova onih članova Upravnog odbora koji su prisutni i glasali su na sjednici Odbora, održanoj u skladu s članom 29. ovog zakona (sjednice Upravnog odbora), izuzev odobrenja dugoročnog razvojnog plana prijenosnog sistema koji podnosi Prijenosna kompanija kada je potrebna jednoglasna odluka. U slučaju da se ne može postići jednoglasna odluka o odobrenju plana razvoja prijenosa, automatski će biti proglašena nemogućnost donošenja odluke i nezavisni član Upravnog odbora, u skladu s članom 25. ovog zakona, imat će odlučujući glas kako bi se otklonio zastoj.

#### Član 25.

##### **Imenovanje Upravnog odbora**

1. Upravni odbor sastojat će se od sedam (7) članova s punim pravom glasa i jednog (1) nezavisnog člana, uz ravnopravnu zastupljenost konstitutivnih naroda u BiH.
2. Jednog (1) nezavisnog člana s pravom glasa utvrđenim u članu 24. ovog zakona (Odlučivanje Upravnog odbora) kandidirat će vlade entiteta, a potvrditi Vijeće ministara. Imenovanje nezavisnog člana obaviti će se prema članu 48. ovog zakona (Imenovanje i status nezavisnog člana Upravnog odbora u prijelaznom periodu). Nakon isteka prijelaznog perioda, nezavisni član može biti državljanin bilo koje zemlje. Mandat nezavisnog člana traje pet (5) godina.
3. Sedam (7) članova Upravnog odbora s punim pravom glasa imenuju entiteti. Broj članova koje imenuje svaki entitet bit će proporcionalan neto vrijednosti sredstava prenesenih na Prijenosnu kompaniju od strane entiteta, u skladu sa Statutom Prijenosne kompanije.
4. Vlada Federacije Bosne i Hercegovine predlaže članove Upravnog odbora iz Federacije Bosne i Hercegovine. Vlada Republike Srpske predlaže članove Upravnog odbora iz Republike Srpske. Vijeće ministara glasanjem odobrava ili odbija predložene kandidate. Sva imenovanja u Upravni odbor bit će završena u skladu s članom 40. ovog zakona (Imenovanje i prva sjednica Odbora).
5. Podjela početnih imenovanja i mandata Upravnog odbora između entiteta bit će raspoređena po sljedećem rasporedu:
  - a) Dva člana, jedan kojeg imenuje Vlada Federacije Bosne i Hercegovine i jedan kojeg imenuje Vlada Republike Srpske, na pet (5) godina;
  - b) Dva člana, jedan kojeg imenuje Vlada Federacije Bosne i Hercegovine i jedan kojeg imenuje Vlada Republike Srpske, na četiri (4) godine;
  - c) Dva člana, jedan kojeg imenuje Vlada Federacije Bosne i Hercegovine i jedan kojeg imenuje Vlada Republike Srpske, na tri (3) godine;
  - d) Jedan član, kojeg imenuje Vlada Federacije Bosne i Hercegovine, na dvije (2) godine.
6. Članovi Upravnog odbora u narednom mandatu bit će imenovani odmah na način predviđen ovim članom.
7. Nominacije i imenovanja bit će u skladu s važećim Zakonom o ministarskim imenovanjima, imenovanjima u Vijeću ministara i drugim imenovanjima ("Službeni glasnik BiH", broj 7/03).

8. Odredbe člana 5.1 Zakona o prijenosu, kojima se predstavnicima vlasnika Prijenosne kompanije omogućava da postanu članovi Upravnog odbora NOS-a, ukidaju se.

#### Član 26.

##### **Mandati članova Upravnog odbora**

1. Mandati članova u prvom sastavu bit će raspoređeni u skladu s članom 25. ovog zakona (Imenovanje Upravnog odbora).
2. Svaki član Upravnog odbora bit će na dužnosti do isteka mandata na koji je imenovan i do imenovanja njegovog ili njenog nasljednika, ili do opoziva u skladu s članom 28. ovog zakona (Opoziv člana Upravnog odbora i generalnog direktora).
3. Nakon prvog mandata, članovi Upravnog odbora imenuju se na period od pet (5) godina. Nijedan član Upravnog odbora ne može obavljati dužnost u više od dva (2) mandata.

#### Član 27.

##### **Uslovi za imenovanje članova Upravnog odbora i generalnog direktora**

1. Članovi Upravnog odbora moraju imati univerzitetsku diplomu iz tehničkih, ekonomskih ili pravnih nauka ili ekvivalentne kvalifikacije i moraju imati značajno iskustvo i stručnost u oblastima prijenosa električne energije, usluga električne energije, pravnog restrukturiranja i reformi elektroenergetskog sektora, privatizacije, finansija, računovodstva, konkurentnosti, tržišta, regulacije ili potreba korisnika prijenosne mreže za uslugama električne energije.
2. Lice se ne može kvalificirati za člana Upravnog odbora ili generalnog direktora ukoliko je:
  - a) osuđivano za krivično djelo ili privredni prijestup što je nespojivo s dužnostima člana Upravnog odbora ili generalnog direktora;
  - b) ukoliko mu je zakonom zabranjeno obavljanje drugih dužnosti;
  - c) ukoliko kandidat ima preko šezdesetpet (65) godina starosti na dan imenovanja ili u slučaju produženja mandata; ili
  - d) ukoliko postoji sukob interesa na način propisan u Etičkom kodeksu, ili kada je on prekršen.
3. Članovi uprave NOS-a, uključujući i generalnog direktora, ne mogu u isto vrijeme biti i članovi Upravnog odbora NOS-a.

#### Član 28.

##### **Opoziv članova Upravnog odbora i generalnog direktora**

1. Član Upravnog odbora ili generalni direktor NOS-a može biti opozvan ili njegova ostavka prihvaćena od strane organa koji ga je imenovao i prije isteka njegovog mandata, i to:
  - a) u slučaju bolesti, smrti ili nesposobnosti da obavlja svoje dužnosti;
  - b) u slučaju da mu je izrečena presuda za počinjeno krivično djelo;
  - c) u slučaju sukoba interesa, kako je propisano u Etičkom kodeksu NOS-a ili Zakonu o sukobu interesa u institucijama vlasti Bosne i Hercegovine ("Službeni glasnik BiH", broj 16/02), ili drugim kršenjem Etičkog kodeksa; ili

- d) U slučaju neobavljanja dužnosti, ili ukoliko je član djelovao nezakonito ili s krajnjom nepažnjom.
2. Član Upravnog odbora može dobrovoljno podnijeti ostavku.

#### Član 29.

##### **Sjednice Upravnog odbora**

1. Vrijeme, mjesto i način održavanja sjednica Upravnog odbora utvrdit će se Statutom i Poslovníkom o radu, s tim da se sjednice moraju održati najmanje jednom u tri mjeseca.
2. Sjednice Upravnog odbora može sazvati predsjednik Upravnog odbora ili bilo koja dva člana. Na sjednici mora biti sve vrijeme osiguran kvorum od četiri (4) člana Upravnog odbora, pored nezavisnog člana, kako bi punopravno mogli raditi. Poziv za sjednicu dostavlja se najmanje tri (3) radna dana prije njenog održavanja, osim ukoliko član ne potpiše saopćenje da ne može prisustvovati, prije ili za vrijeme te sjednice, u kom slučaju prethodni poziv nije potreban.

#### Član 30.

##### **Dužnosti članova Upravnog odbora**

1. Članovi Upravnog odbora NOS-a izvršavat će svoje obaveze i ovlaštenja marljivo, u dobroj vjeri i u interesu NOS-a i vlasnika, s pažnjom i sposobnostima koje razumna lica pokazuju u sličnim situacijama i na sličnim funkcijama. Članovi Upravnog odbora imaju obavezu povjerljivosti prema NOS-u. U obavljanju svojih dužnosti, članovi Upravnog odbora mogu se u svim slučajevima pouzdati u finansijske izvještaje Kompanije, bilo da su pismeno ovjereni od strane nezavisnog međunarodnog računovođe ili računovodstvene firme, da bi se na pravi način predstavilo finansijsko stanje NOS-a ili u vidu izvještaja odboru dostavljenog od strane generalnog direktora ili direktora odgovornog za finansijska pitanja.
2. Članovi Upravnog odbora obavijestit će Odbor o njihovom ličnom interesu u bilo kojoj drugoj instituciji, bilo da su vlasnici ili nosioci određene funkcije, bez obzira da li ih ovi interesi mogu dovesti ili ne u sukob s interesima NOS-a. Članovi Upravnog odbora koji nemaju interes u konkretnom slučaju odredit će da li taj interes zahtijeva povlačenje prava tog člana odbora da glasa o bilo kojim pitanjima. Godišnji izvještaj koji je vezan za gore navedene slučajeve bit će poslan premijeru Federacije Bosne i Hercegovine, premijeru Vlade Republike Srpske i DERK-u.
3. Članovi Upravnog odbora ne mogu biti tuženi za službene radnje obavljene u dobroj vjeri prilikom izvršavanja njihovih funkcija. NOS će, u skladu sa Statutom i odgovarajućim pravilnikom, zaštititi od odgovornosti člana Upravnog odbora ili člana uprave od bilo koje pravne radnje koja se može pokrenuti zbog obavljanja dužnosti tog lica u dobroj vjeri, na mjestu člana Odbora ili člana uprave, u skladu sa Statutom i pravilnikom.

#### Član 31.

##### **Komisije i funkcije članova Upravnog odbora**

1. Upravni odbor može većinom glasova svojih članova osnovati svoju izvršnu komisiju i druga radna tijela iz redova svojih članova. Svako tijelo i komisija sastoji se od dva ili više članova. Upravni odbor može ovoj komisiji ili drugim radnim tijelima dodijeliti dio ili cjelokupna ovlaštenja Upravnog odbora, osim ukoliko nije drugačije određeno Statutom. Organizacija, sastav i obaveze takvih komisija i funkcije pojedinačnih članova Odbora utvrđuju se Poslovníkom o radu.
2. Predsjednika Upravnog odbora među sobom biraju članovi Upravnog odbora, osim nezavisnog člana Odbora i to prostom većinom glasova. Sve druge funkcije u Upravnom odboru biraju se glasanjem članova Odbora, na način utvrđen Statutom.

## Član 31.a

### Uprava NOS-a

Upravu NOS-a čine generalni direktor i članovi Uprave u kojoj je isti broj predstavnika tri konstitutivna naroda u BiH.

Odgovornost i način rada Uprave uređuje se Statutom i pravilnicima NOS-a.

## Član 32.

### Proces imenovanja generalnog direktora

Upravni odbor imenuje generalnog direktora NOS-a na osnovu javnog konkursa i transparentnog procesa izbora kandidata.

Generalni direktor i predsjednik Upravnog odbora ne mogu biti iz istog konstitutivnog naroda.

## Član 33.

### Ovlaštenja generalnog direktora

1. Generalni direktor odgovoran je za:
  - a) Upravljanje programima, službama i osobljem Kompanije;
  - b) Organiziranje i rukovođenje poslovnim aktivnostima;
  - c) Utvrđivanje poslovne politike;
  - d) Usmjeravanje i nadgledanje pravnih poslova;
  - e) Usmjeravanje i implementaciju planova poslovanja i razvoja;
  - f) Utvrđivanje i predlaganje Upravnom odboru pravilnika i Etičkog kodeksa,
  - g) Provođenje odluka Upravnog odbora;
  - h) Odlučivanje o organizacionim pitanjima, uključujući i imenovanje i razrješenje službenika NOS-a, u skladu sa Statutom i pravilnicima;
  - i) Pripremanje tromjesečnih i godišnjih izvještaja o poslovnim aktivnostima i njihovo podnošenje na uvid Upravnom odboru;
  - j) Donošenje Pravilnika i drugih akata i propisa NOS-a, osim Statuta;
  - k) Zastupanje NOS-a u pravnim sporovima;
  - l) Provođenje svih drugih aktivnosti koje Odbor smatra neophodnim i koje su potrebne za efikasno poslovanje NOS-a, u skladu s ovim zakonom, Statutom i pravilnicima.
2. U rukovođenju i upravljanju poslovanjem NOS-a, generalnom direktoru pomažu članovi Uprave.

3. Generalni direktor vršit će svoju dužnost i koristiti ovlaštenja u dobroj vjeri, imajući u vidu interese NOS-a i njegovih vlasnika, marljivo, s brigom i vještinom koju bi razumna lica pokazivala u sličnim situacijama i na sličnim funkcijama.

4. Generalni direktor obavijestit će Upravni odbor u slučaju sukoba između njegovih ličnih interesa u drugoj kompaniji, bilo kao vlasnika ili nosioca funkcije, ili bilo kojeg drugog ličnog interesa, s interesima NOS-a. Upravni odbor odlučit će da li potencijalni sukob interesa zahtijeva od generalnog direktora da prenese odgovornost za donošenje odluka o pitanjima u vezi s potencijalnim sukobom interesa na drugog člana uprave NOS-a.

Član 34.

#### **Mandat generalnog direktora**

Generalni direktor obavljat će funkciju četiri (4) godine, osim ukoliko se ne razriješi dužnosti u skladu s članom 28. ovog zakona (Opoziv člana Upravnog odbora i generalnog direktora), ili člana 35. ovog zakona (Opoziv), a može biti ponovo imenovan na jedan dodatni mandat u trajanju od četiri (4) godine. Nijedno lice izabrano za generalnog direktora ne može biti na toj poziciji duže od osam (8) godina.

Član 35.

#### **Opoziv**

Generalni direktor može biti opozvan s dužnosti od strane Upravnog odbora, u skladu s članom 28. ovog zakona (opoziv članova Upravnog odbora i generalnog direktora).

Član 36.

#### **Likvidacija**

1. Vijeće ministara, Vlada Republike Srpske ili Vlada Federacije Bosne i Hercegovine mogu pokrenuti postupak za likvidaciju NOS-a. Prije početka postupka likvidacije NOS-a neophodno je za to dobiti odobrenje DERK-a.

2. U roku od tri (3) dana nakon pokretanja postupka likvidacije i prispjeca odobrenja za likvidaciju od strane DERK-a, obavijest o namjeri likvidacije NOS-a dostavit će se u skladu sa Zakonom o registraciji.

3. Nakon podnošenja obavijesti o namjeri likvidacije, NOS će biti likvidiran u skladu s postupkom koji je utvrdio Upravni odbor i u skladu s važećim propisima koji se odnose na likvidaciju kompanija registriranih po Zakonu o registraciji.

#### **PRIJELAZNE ODREDBE**

Član 37.

#### **Odnos prema drugim zakonima**

1. Ovaj zakon zasniva se na odredbama Zakona o prijenosu. Sve odredbe ovog zakona zamjenjuju vremenske rokove, raspored i zahtjeve propisane Zakonom o prijenosu ili drugim zakonima i propisima koji su važili prije stupanja na snagu ovog zakona, a koji mogu biti u direktnoj suprotnosti s odredbama ovog zakona.

2. Osim ukoliko nije drugačije propisano ovim zakonom, dok se ne donesu zakoni i propisi Bosne i Hercegovine o pitanju radnih odnosa, penzija, poreza, eksproprijacije, likvidacije i drugih pravnih pitanja koja su potrebna za efikasno funkcioniranje NOS-a, primjenjivat će se zakoni i propisi Federacije Bosne i Hercegovine i Republike Srpske u skladu sa Statutom. U slučaju sukoba zakona o

pitanjima koja proističu iz ugovora, Statutom će se utvrditi pravni režim koji će se primijeniti. U slučaju sukoba zakona o pitanjima koja nisu povjerljive prirode, kao što su, između ostalog, oporezivanje i eksproprijacija, primjenjuje se princip teritorijalnosti.

3. Nakon stupanja na snagu zakona koji reguliraju pitanja iz stava 2. ovog člana, entitetski zakoni i propisi neće se primjenjivati.

Član 38.

#### **Rad u prijelaznom periodu**

U toku perioda koji počinje s danom stupanja na snagu ovog zakona i završava s danom registracije NOS-a prema članu 5. ovog zakona (Osnivanje NOS-a i prijenos sredstava i obaveza), ZEKC može izvršavati obaveze i dužnosti koje su dodijeljene NOS-u prema ovom zakonu.

Član 39.

#### **Prelaz zaposlenika**

1. Od dana registracije NOS-a, svi zaposlenici, zaposleni radi obavljanja aktivnosti vezanih za ZEKC, udruženje elektroprivreda, postaju zaposlenici NOS-a.

2. Ništa što je sadržano u ovom zakonu neće ograničiti diskreciono pravo Upravnog odbora, ni generalnog direktora, da uruči otkaz ili izmijeni opis poslova, doprinose i nadoknade za bilo kojeg zaposlenika NOS-a, u skladu sa zakonima Bosne i Hercegovine.

Član 40.

#### **Imenovanje i prva sjednica Upravnog odbora**

1. Prva imenovanja u Upravni odbor obaviti će se najkasnije devedeset (90) dana od dana stupanja na snagu ovog zakona.

2. Upravni odbor sastati će se u roku od deset (10) dana od dana imenovanja.

3. Najstariji član Upravnog odbora privremeno će obavljati dužnost predsjednika Odbora u svrhu sazivanja prve sjednice Upravnog odbora, sve dok Upravni odbor ne izabere predsjednika. Na prvoj sjednici članovi Upravnog odbora će: a) preduzeti sve potrebne korake da okončaju popis sredstava, donesu odluke o pitanju zaposlenika i procjeni sredstava i b) utvrditi početni budžet za sve svoje troškove koji će se pojaviti u procesu osnivanja NOS-a prije registracije NOS-a i isti dostaviti DERK-u na odobrenje, u skladu s članom 42. ovog zakona (Osnivački troškovi NOS-a i zahtjev za odobrenje DERK-u).

Član 41.

#### **Imenovanje generalnog direktora**

Najkasnije četrdeset i pet dana (45) od svoje prve sjednice, Upravni odbor imenovati će generalnog direktora.

Član 42.

#### **Osnivački troškovi NOS-a i zahtjev za odobrenje DERK-u**

1. Najkasnije trideset (30) dana nakon svoje prve sjednice, Upravni odbor podnijeti će prijedlog obračuna troškova za osnivanje NOS-a kao i prijedlog budžeta Javnom preduzeću Elektroprivreda

Bosne i Hercegovine, Elektroprivredi Hrvatske zajednice Herceg-Bosne i Javnom matičnom preduzeću Elektroprivreda Republike Srpske. Elektroprivrede su odgovorne za plaćanje troškova osnivanja NOS-a proporcionalno relativnoj neto vrijednosti sredstava koja je određena elektroprivreda unijela u NOS. Ukoliko proporcionalne iznose nije moguće odrediti, predloženi osnov za obračun može biti po jedna trećina udjela za svaku od tri elektroprivrede, a elektroprivrede će biti odgovorne za odgovarajuće konačno utvrđivanje troškova nakon osnivanja NOS-a. Upravni odbor može podnijeti revidirani obračun trima elektroprivredama za dodatne troškove kako bi oni bili pokriveni usljed kašnjenja ili iz nekog drugog opravdanog razloga.

2. Ako se tri elektroprivrede saglase s predloženim budžetom, odgovorne su za urgentno plaćanje svojih udjela u troškovima osnivanja.

3. Ako tri elektroprivrede ne izvrše plaćanje svojih proporcionalnih udjela iz obračuna troškova podnesenog od strane Upravnog odbora u roku od trideset (30) dana od dana podnošenja, spor će se hitno uputiti na rješavanje po skraćenom arbitražnom postupku propisanom u ovom členu. Ovaj postupak arbitraže bit će isključivi pravni lijek za bilo koji spor koji se bude odnosio na troškove osnivanja na osnovu ovog člana.

4. Kako bi pokrenuo skraćeni arbitražni postupak koji se bude odnosio na troškove osnivanja, Upravni odbor ili elektroprivrede podnijet će obračun troškova ministru za energiju, industriju i rudarstvo Federacije Bosne i Hercegovine i ministru industrije, energetike i razvoja Republike Srpske. Dva ministra odabrat će trećeg arbitra na osnovu uzajamnog sporazuma u roku od trideset (30) dana od dana podnošenja prvog zahtjeva za arbitražu nakon isteka prijelaznog perioda. Ako dva ministra u propisanom roku ne odaberu trećeg arbitra, tada će Vijeće ministara imati dodatni rok od trideset (30) dana da to učini. U slučaju da Vijeće ministara ne odabere trećeg arbitra u propisanom roku, tada Visoki predstavnik može odlučiti da imenuje trećeg arbitra. Upravni odbor i elektroprivrede u potpunosti će saradivati kao strane u arbitražnom postupku. Arbitraža će biti obavljena po skraćenom postupku u roku od 30 dana od dana imenovanja trećeg arbitra. Arbitražna odluka donijet će se na osnovu većine glasova među tri arbitra. Odluka će biti konačna i obavezujuća za NOS i elektroprivrede kao i za njihove sljednike u oblasti proizvodnje ili distribucije i neće biti mogućnosti žalbe na ovu odluku.

5. U roku od šezdeset (60) dana od svoje prve sjednice, Upravni odbor uputit će DERK-u zahtjev za odobrenje početnih tarifa. DERK će izdati rješenje uspostavljajući privremenu tarifu u roku od šezdeset (60) dana od dana podnošenja zahtjeva s tim da to rješenje može uključivati uslove za buduća podešavanja tarife.

Član 43.

#### **Usvajanje Statuta**

U roku od četrdeset pet (45) dana od dana izdavanja konačnog rješenja DERK-a povodom zahtjeva za odobrenje početnih tarifa, Upravni odbor odobrit će Statut. Statut kao i svaka njegova izmjena i dopuna bit će objavljeni u "Službenom glasniku BiH".

Član 44.

#### **Usvajanje pravilnika i Etičkog kodeksa**

U roku od devedeset (90) dana od dana imenovanja, generalni direktor predložit će, a Upravni odbor usvojiti pravilnike i Etički kodeks NOS-a kako bi se omogućilo uspješno funkcioniranje NOS-a.

Član 45.

#### **Registracija NOS-a i početak poslovanja**

1. U roku od deset (10) dana od usvajanja Statuta, Upravni odbor podnijet će prijavu za registraciju NOS-a. Ta prijava bit će sačinjena u skladu sa uslovima propisanim u Zakonu o registraciji.

2. Upravni odbor preduzet će sve neophodne aktivnosti kako bi se osiguralo da elektroprivrede i Prijenosna kompanija okončaju aktivnosti koje su delegirane isključivo NOS-u u skladu s članom 7. ovog zakona (Ovlaštenja NOS-a) poslije registracije i početka poslovanja NOS-a. Pored toga, Upravni odbor preduzet će sve neophodne aktivnosti kako bi se osiguralo da su sva sredstva, obaveze i zaposlenici, potrebni za poslovanje NOS-a, preneseni na isti od strane elektroprivreda u skladu s članom 5. (Osnivanje NOS-a i prijenos sredstava i obaveza) i 39. (Prelaz zaposlenika) ovog zakona.

#### Član 46.

#### **Trajanje prijelaznog perioda**

1. Prijelazni period počinje danom stupanja na snagu ovog Zakona i prestaje kada: a) su završeni svi prijenosi sredstava, obaveza i prelaz zaposlenika neophodnih da bi NOS djelovao u skladu s čl. 5.(Osnivanje NOS-a i prijenos sredstava i obaveza) i 39. (Prelaz zaposlenika) ovog zakona; b) je NOS registriran prema članu 8. ovog zakona (Reguliranje NOS-a i međusobni odnosi s Prijenosnom kompanijom), i c) su imenovana četiri (4) člana Upravnog odbora, pored nezavisnog člana, u skladu s članom 25. ovog zakona (Imenovanje Upravnog odbora). Nakon tog datuma prestanka, nezavisni član bit će član Upravnog odbora u skladu s ovlaštenjima iz člana 24. (Donošenje odluka Upravnog odbora) i 25. (Imenovanje Upravnog odbora) ovog zakona.
2. Kada su ispunjeni uslovi iz ovog člana za okončanje prijelaznog perioda, Upravni odbor formalno će proglasiti kraj prijelaznog perioda i to javno objaviti u "Službenom glasniku BiH".

#### Član 47.

#### **Vanredna ovlaštenja nezavisnog člana Upravnog odbora**

1. U slučaju da se bilo koja od sljedećih aktivnosti ne završi u rokovima navedenim u daljnjem tekstu, nezavisni član preuzet će isključiva ovlaštenja za osnivanje NOS-a u skladu s ovim članom preuzimajući bilo koje vršenje ovlaštenja za osnivanje NOS-a od ostalih članova odbora, i to:
  - a) u roku od stotinu i šezdeset (160) dana nakon stupanja na snagu ovog zakona; sva imenovanja u Upravni Odbor (član 25.); prva sjednica Upravnog odbora (član 40.); imenovanje generalnog direktora (član 41.); podnošenje Obračuna troškova osnivanja NOS-a i upućivanje zahtjeva na odobrenje DERK-u (član 42.)
  - b) usvajanje Statuta u roku propisanom u članu 43. ovog zakona;
  - c) odobrenje pravilnika i Etičkog kodeksa u roku propisanom u članu 44. ovog zakona;
  - d) zahtjev za registraciju NOS-a u roku propisanom u članu 45. ovog zakona.
2. U preostalom prijelaznom periodu na osnovu člana 46. ovog zakona (Trajanje prijelaznog perioda), nezavisni član vršit će sva ovlaštenja Upravnog odbora u cilju osnivanja i početka poslovanja NOS-a. U toku ovog perioda, članovi Upravnog odbora nastaviti će ulagati svoje napore kako bi pomogli nezavisnom članu u završetku preostalih zadataka u procesu osnivanja NOS-a. Nezavisni član nastojat će redovno sazivati sastanke s imenovanim članovima Upravnog odbora i s njima vršiti konsultacije kako bi postigao konsensus u vezi s odlukama o osnivanju NOS-a.
3. Nakon završetka prijelaznog perioda na osnovu člana 46. (Trajanje prijelaznog perioda), sva ovlaštenja prelaze ponovo na Upravni odbor.
4. Ako nezavisni član preuzme isključiva ovlaštenja za osnivanje NOS-a na osnovu ovog člana, on će imati sva ovlaštenja Upravnog odbora iz ovog zakona kao i sljedeće vanredno ovlaštenje:
  - a) Do mjere koja bude neophodna kako bi se osiguralo osnivanje NOS-a, nezavisni član vršit će sva ovlaštenja vlasnika NOS-a do završetka prijelaznog perioda. Vršenje vlasničkih prava od strane



nezavisnog člana bit će isključivo i preduprijedit će svako drugo vršenje ovlaštenja od strane vlasnika, s tim da će nezavisni član vlasnicima pružati razumne informacije u vezi s aktivnostima koje preuzima u skladu s ovlaštenjima iz ovog člana.

5. Za vrijeme trajanja prijelaznog perioda, nezavisni član neće biti krivično odgovoran ili tužen u parnici za bilo koji akt izvršen u okviru njegovog djelokruga dužnosti u skladu s ovim zakonom.

Član 48.

#### **Imenovanje i status nezavisnog člana Upravnog odbora u prijelaznom periodu**

1. Bez obzira na odredbe člana 25. ovog zakona (Imenovanje Upravnog odbora), u toku prijelaznog perioda iz člana 46. (Trajanje prijelaznog perioda) nezavisni član Upravnog odbora imenuje se u skladu sa Zakonom o ministarskim imenovanjima, imenovanjima u Vijeću ministara i drugim imenovanjima, ("Službeni glasnik BiH", broj 7/03), ali u svakom slučaju bit će imenovan najkasnije šezdeset (60) dana nakon dana stupanja na snagu ovog zakona. Nezavisnog člana kandidiraju entitetski premijeri a imenuje ga Vijeće ministara BiH, samo za prijelazni period. U slučaju da Vijeće ministara ne imenuje nezavisnog člana u roku i u skladu s ovim članom, visoki predstavnik može odlučiti da imenuje nezavisnog člana. Nezavisni član Upravnog odbora neće biti državljanin Bosne i Hercegovine.

2. U toku prijelaznog perioda nezavisni član dostavljaće mjesečne izvještaje premijeru Federacije Bosne i Hercegovine, premijeru Republike Srpske i predsjedavajućem Vijeća ministara Bosne i Hercegovine, a kopije izvještaja dostavljaće ministru vanjske trgovine i ekonomskih odnosa, ministru energije, industrije i rudarstva Federacije BiH i ministru industrije, energetike i razvoja Republike Srpske.

3. Nakon završetka prijelaznog perioda, Vijeće ministara može imenovati novog nezavisnog člana u skladu s odredbama člana 25. ovog zakona (Imenovanje Upravnog odbora). Prvi nezavisni član ostat će na dužnosti do imenovanja novog člana.

#### **ZAVRŠNE ODREDBE**

Član 49.

#### **Stupanje na snagu**

Ovaj zakon stupa na snagu osmog dana od dana objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

PS BiH broj 74/04  
16. jula 2004. godine  
Sarajevo

Predsjedavajući  
Predstavničkog doma  
**Martin Raguž**, s. r.

Predsjedavajući  
Doma naroda  
**Goran Milojević**, s. r.